



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma : f Tir Yimiyim

Instagram tiryimiyim@aolima

YouTube tir yimiyim

TAPAK 7



Myanmar opposition temi rongrong adokdaksür: Min Aung Hlaing

Gurmeet Ram Rahim Singh taküm piyong tepuokdak ayutsü



VOL. XIX NO. 11 (ADOK 11) DIMAPUR

SANGTENNÜ (TUESDAY)

MONGPUTENI (OCTOBER) 19, 2021

₹ 5.00

Mokokchung nung power supply shitak magütsür: MCCI

Dimapur, October 18, 2021 (TYO): Mokokchung nung power supply shitak magütsüba ajanga consumers dang masü saka shishilembaba tsütsü takoksa jenti ajurur aser sentsüh bendenloker, ta Mokokchung Chamber of Commerce & Industry (MCCI)-i metetdaksüogo.

"Mokokchung nung tawa power shitak mangur aser minute 60 tsüingda 5 ben tashi power shibanger. Iba ajanga electronic oset aser hadirtem raksar saka power department-i iba atema temenok magütsütetsü" ta MCCI-i Executive Engineer, Electrical Division (Dept. of Power), Mokokchung dang shidi ka nung ashi.

Nagaland nung power agirtemi timtem kecha melii 24x7 power supply agütsü atema sen agütsütsü molunga dang lir saka iba ama

mapang ajurutsüji pungmang nunga mepungmanger, ta parnokisa ashi.

Nagaland sorkari nübortem tenzüka wadang nung teinyaktsü karbo inyaktü imlar aser talisa akokba tashi power supply shitak agütsütsü merangtsüla, ta MCCI-isa metetdaksüogo.

Power supply shitak magütsütetsü süra bangdak department-i 'load shedding' mapang shitak lemsatsüla. Department-i hopta mesüra hopta ana atema 'load shedding' mapang lemsar public nem metetdaksütsü tim. Ajisüaka, 'load shedding' mashii asüba ajanga nübortem timtem ajuruba dang masü saka industry tem asoshi takoksa bentsür arur aser iba ya power department-i mapa shitak meinyakba kuli lir, ta MCCI-isa Executive Engineer dang ashi.

COVID-19 Nagaland: 16 dak putet, 9 taneptsü angu & 1 asü

Kohima, October 18, 2021 (TYO): Nagaland nung Hombarnü nisung 16 dak COVID-19 putet aser nisung ka asü.

"Tesüüba ghonda 24 tsüingda nisung 16 dak COVID-19 putet. Parnokji Dimapur nung 10, Mokokchung nung 4 aser Kohima o Mon nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Kasa mapang COVID-19 puteta alir nisung 9 tashi taneptsü angu. Parnokji Dimapur nung 6 aser Kohima nung 3 lir" ta paisa ashi.

Nisung 31,627 rongnungi 29,676 taneptsü nguogo aser ibaji 93.21% taneptsü anguba lir, ta Dr Kikon-isa metetdaksü.

Tang nisung 252 anepaludar saka parnok 191 dakbo shirangba

yimya kecha mali, ta paisa ashi.

Hombarnü Mon nung COVID-19 puteta alir ka asü aser iba nisung züingsema tasür ajak agi 675 kümogo ta Dr Kikon-isa shisem.

"Deobar tashi nung nisung 701,383 nem COVID-19 vaccine indang dose 11,39,339 agütsüogo" ta State Immunization Officer, Dr Ritu Thurr-ia metetdaksü.

"Vaccine agirtemji frontline workers 60,945, healthcare workers 15,998, arishi küm 45 ser tempur 200,667 aser arishi küm 18 nungi 44 tsüingda alir 423,773 lir" ta paisa ashi.

"Vaccine agirtem rongnungi nisung 437,856-i dose anaprong agiogo. Parnokji frontline workers 47,716, healthcare workers 13,331, arishi küm 45 ser tempur 151,157 aser arishi küm 18 nungi 44 tsüingda alir 225,652 lir" ta Dr Thurr-isa metetdaksü.

ISI-i Assam nung kiralongra mapa inyaktü akok: Assam Police

Guwahati, October 18, 2021 (Agencies): Pakistan indang Inter Services Intelligence (ISI) ajanga Assam aser linük kübok tanga tesemtem kiralongra mapa inyaktü akok ta osang angazükba sülen Assam Police-i kumdanga alitsü sangoktsüogo.

Assam Police nung Assistant Inspector General of Police (L&O)-i iba atema sangdong ka agütsüogo.

Pakistan indang spy agency ISI-i RSS züingsemtem, army aliba tesemtem, lokti adenshidak aser tamangba yimsü dak sendakba tesemtem amaktsü akok ta Assam Police-i ashir.

"Pak-ISI ajanga Assam aser India kübok tanga tesemtem nung RSS züingsemtem aser army alidak dena kija aser tesem balala amaktsü tasa atonga lir ta onoki osang angazükogo" ta parnok metetdaksü.

"Organization of Islamic Cooperation (OIC) indang General Secretariat-i sangdong ka agütsüba nung Dhalpur nungi nisungtem meindokba indang shia

lir. Assam nung Muslim nung reshikangshiba aser tashiyim inyaktü Muslim nung aika taküm sama ta parnok shia lir" ta Assam Police-isa sangdong nung shia lir.

"Ano al-Qaeda ajanga video osang ka sangoktsüba nung Assam aser Kashmir nung jihad inyaktü shia lir. Al-Qaeda-i propaganda video ka prokshiba nung Indian Muslim nung tepsetba indang sayua lir aser iba nung Assam nungi video kar dena lir aser parnok Assam o Kashmir nung jihad inyaktü ayongzüka lir" ta parokisa ashi.

Iba sangdong nungsa Commissioner of Police, Guwahati city, district police ajak, Special DGP (T&AP) aser IP (BTAD), Kokrajhar, ADGP's (SB/S) Assam, aser range ajak nungi DIG tem dang kumdangtsü shia lir.

"District police aser intelligence maparen akangshiang aser nenok telongtet aliba ketdangsür aser police ajak nem osang sangokjang" ta Assam Police-isa metetdaksü.

Zapuvisie Lhousa-i Naga National Martyrs Day putiotsü lemsatöp

Kohima, October 18, 2021 (TYO): October 18, 1952 nü Kohima tiyongtsü nung Indian army ketdangsür kati Zasibito Nagi dang taochi kecha mesayui tepsetba otsü tanü NNC Central Executive Council züingsem Zapuvisie Lhousa-i lemsatöp.

Naga National Martyrs Day amongdang Lhousa-i Naga nung er atema taküm bendanga agütsür Nagi tepsetba osang metetdaksü.

"Iba mapang Nagi-i Western Angami Group, NNC Vice President aser Kohima Central Court nung Judicial Member inyaka liasü" ta Lhousa-i ashi.

Assam Police-i Dimapur nung Sema nung tanur ka kanga mejungi reshikangshi aser ibaji anema October 18, 1952 nü Kohima

nung aliba Naga nungertemi ola madoki lungkak aitba sentong ka agi, ta paisa metetdaksü.

"Iba anogo Captain Verick ta ser Indian Intelligence ketdangsür ka motor cycle ka nung mener arur lokti sentong anendaksü. Idangji taintemi pa nem angatetdaksütsü atema jembu saka Assam Police ketdangsür kati pistol agiteter Zasibito dak injang khaloktsü aser iba nikongdang Zasibito ji Naga Hospital nung asü" ta Lhousa-isa ashi.

Iba taoktsü aketba osang angashiba sülen October 19, 1952 nü ana aser talang nungi Zasibito mangyimertem adenshi aser Jotsoma nung pa mang ali nung marem tashi anük, ta paisa metetdaksü.

Naga National Council (NNC)-

i October 18 nü Naga National Martyrs Day amongtsü lemtet aser iba anogo nungi tenzüker küm shia Naga lima atema taküm bendanga agütsürtem bilemteta aser tushia amonger, ta Lhousa-i ashi.

Küm shia National Martyrs Day amongdang Zasibito tenüing bilemteter aser Naga National wako tom nung ayur, ta paisa shisem.

Zapuvisie Lhousa-i "Strange Country, my experience in Naga Nationalism" ta ser kaket ka zülua lir.

Iba sentong nung Western Angami Public Organization, Naga national workers, Angami Students' Union, Western ASU, Jotsoma Students Union, tetsürtem aser kinungertem aden.

Karnataka tenla kidang Hindu nung tekülem ken tena lungkak ait

Bengaluru, October 18, 2021 (Agencies): Deobarnep Karnataka kübok Hubballi nung Bajrang Dal aser Vishwa Hindu Parishad züingsemtemi tenla ki ka nungpoka atu aser bhajans mesüra Hindu tekülem kentem tena lungkak ait.

Iba tesem nung tashiyim agi tamangba yimsü melendaksür ta tai tonglokja parnok iba mapa inyak.

Deobarnep 11:00 ako meta Bairidevarkoppa Church nung tetsür aser tebur telok ka ali nung mener aser teka amteper bhajans adenba indang video ka prokshir. Iba sülen local BJPMLA Arvind Bellad-i pastor Somu Avaradhi apusü takhangba agüja highway mokdang lungkak ait.

Arogo züingsemtem aser Bajrang Dal o VHP züingsemtemia parnok amak ta tai tongloktsür.

Pastor Somu aser pa den yariteper kar terara yirur mozü kidang anioka anepalu.

Protection of Scheduled Castes and Tribes aser tamangba yimsü anema asa mapa inyakba ken o tem kübok Pastor Somu aser tangartem anema ken o ka benokogo.

Iba atema police-i pastor pua lir saka pa den külemi apuba nisung asembo asüingdangya asüba sülen chiokego.

Arogo ketdangsürtemia iba tatalokba atema ken o ka benokogo ta ashir.

"Onoki bushisingdang südar. Somu Avaradhi dang pua lir. Tang tashi nung arogo nungi ken o ka dang mangu" ta Hubli-Dhadwad atema Commissioner of Police, Labu Ram-i ashi.

"Vishvanath ta ser nisung ka tamangba yimsü melendaksütsü atema tenla kidang anir ao. Pai tenla kidang nungi indangindanga police station-i ao aser Pastor Somu o tangartem anema ken o benok. Iba sülen ozü züingsemtemi lungkak

aitsü atema tenla kidang adenshi aser Hindu bhajan tem aten" ta Bajrang Dal indang State Convenor, Raghu Sakleshpora-ia ashi.

"Onoki iba nung aibelen kecha meinyak" ta Bajran Dal activist Shashi-ia ashi.

Vishvanath-i pastor aser tangartem anema ken o benok aser pai ashiba agi pastor-i tashiyim agi pa tamangba yimsü melendaksütsü merang saka pai Khristan sarasadem masü Hindu sarasadem asü.

Ajisüaka, arogo ketdangsürtemioba tamangba yimsü melendaksütsü indang mapa kecha meinyak ta ashir.

"Bajrang Dal aser Vishwa Hindu Parishad züingsemtemi onok tenla kidang bhajan atentsü tenzükdang pastor Somu Avaradhi aru. Ajisüaka, parnok pa tenla kidang nungi meindok. Iba rongrong nung tetsür kar aliba yiru" ta reverend Cedric Jacob-i ashi.

India anüdoklentip tsütsü tzüinglu kanga arur; 3 asü

New Delhi, October 18, 2021 (Agencies): Hombarnü India anüdoklentip tsütsü tzüinglu kanga aruba ajanga lendong balala nung nisung asem asü aser Kerala nung zünokdang 10 atema 'red alert' sangoktsüogo.

1960 nungi Delhi nung taküm October ita ya tzüinglu taruba ita ka lir aser 93.4 mm tzüinglu aruogo, ta India Meteorological Department (IMD)-i ashi.

Tanü Rajasthan, West Bengal, Tamil Nadu, Puducherry, Haryana, Madhya Pradesh, Uttar Pradesh aser Telangana kübok tesem aika nung tzüinglu kanga aruogo, ta parnokisa ashi.

Uttarakhand nung Nepal nungi aayanger asem asü aser ana yiru ta ketdangsürtemi ashi.

Pauri district kübok Samkhal nung aayangertemji süki ka nung lia,

tzüinglu aruba ajanga anentsüh agi anenbang, ta District Magistrate Vijay Kumar Jogdande-i ashi.

Kerala nung Deobar tashi nung tzüinglu kanga aruba ajanga lendong balala nung nisung 22 tashi taküm samaogo.

"Kerala nung aliba zünokdang 10 asoshi 'red alert' sangoktsüogo aser Kakki dam indang shutters ana lapok. Sabarimala nung Lord Ayyappa temple-i temeshi aini aoba maparen anena lir" ta Kerala Revenue Minister K Rajan-i ashi.

Delhi nung yashinep 8:30 ako nungi tanep 8:30 ako tsüingda tzüinglu 87.9 mm aruogo, ta IMD-i ashi.

Madhya Pradesh nunga tanep 8:30 ako tashi tzüinglu aruba manen.

Taruba anogo ana tashi Madhya Pradesh nung tzüinglu arutsü, ta senior meteorologist P K Saha-i ashi.

Meteorological (MeT) Department-isa south Bengal kübok district ajak nung Hombarnep aser Mongulbar anogotem tzüinglu kanga arutsü ta metetdaksüogo.

Uttar Pradesh nunga Deobarnep nungi Muzaffarnagar, Shamli, Baghpat aser Meerut district tem nung tzüinglu aruba manen aser iba ajanga tesem aika tzü agi metsüingbanga lir.

Tesüüba ghonda 24 tsüingda Rajasthan nunga tesem aika nung tzüinglu aruogo, ta MeT Department-isa metetdaksü.

Odisha nunga tzüinglu arutsü osang sangoktsüogo aser angopurtem dang züiyimi maotsü tetuyuba agütsüogo.

Mongulbar 8:20 ako tashi Odisha kübok Balasore aser Mayurbhanj district tem nung 'orange alert' agütsüogo.

Barak Valley nung Assamese oshi anema lungkak ait

Silchar, October 18, 2021 (Agencies): Deobarnü Silchar Railway Station nung telok aikati sorkar indang awareness poster ka enokba anema lungkak aitogo.

Assamese oshi nung Jal Jeevan Mission indang poster ayuba atema parnok lungkak ait.

"1961 language pact nung

Cachar aser Barak Valley nung official oshiji Bengali oshi amshitsü nangzüktepa lir anungji sorkari iba tenangzüktep alema Assamese oshi nung poster zülü" ta Barak Democratic Youth Front (BDYF) aser All Bengali Students Youth Organisation (ABSYO)-i ashi.

Parnoki iba poster ayuba magizükba sayua ink tanak agi nübang aser sorkar dang Bengali oshi nung zülutsü takhangba agütsü.

BDYF aser BDYF lennirtemisa Barak nung alirtem dang iba mesükba posters ngura endokang ta metetdaksüogo.

Dimapur nung Power auüyartem mita reprangtsü



Joint Secretary, Power, Sara S Jamir (NCS) den Dimapur district kübok Power Department nungi ketdangsürtem October 18, 2021 nü külemi tangokba noksa ka yangi angur.

Dimapur, Mongputeni/Oct. 18 (TYO): Dimapur nung power auüyaba mita reprangtsü, revenue bendenba tajungba kumdaktsütsü aser power system tajungtiba nung ketdangsütsü atema tentetba state level special team ka October 18, 2021 nü SE power office, Nagarjan, Dimapur nung Department of Power nungi ketdangsürtem, district administration nungi teshimtet nübu tem aser district police tem den senden mena liasü.

Electricity bill magütsüba mechi power line disconnect

sütsütsü atema special drive tenzüksü aser özüng alema power agiba/auüyaba tebilemtsü aziöktsü atema iba senden ya mena liasü.

Department ajanga teti item mapa mita aoba aser disconnect sütsüba den külemi district administration aser police den lungjemer özüng alema power agiba/power auüyaba mita aoba aser electricity bill magütsüba yong line disconnect sütsüba mita aotsü, ta iba senden nung telemtetba agia liasü.

Iba dak sendakba nung team leader Sara S Jamir (NCS),

Joint Secretary, Power ajanga yimtsüng ketdangsür, GBs, colony lenirtem aser nüburtem dang pei tesem nung iba timtem aziöktsü atema amalitep alitsü ayongzüka liasü.

Power auüyaba ajanga Transformer overload akumer aser iba yongji transformer mapa shidak meinyakteter, ta lai ashi.

Nüburtem teyari nung power auüyaba tebilemtsü samadaktsütsü aser tajungba nung asameyanga Dimapur nung power supply tajungba akumtsü, ta Sara-i ashi.

Nagaland Governor-i Eid-e-Milad benjong salem lemsatep

Dimapur, Mongputeni/Oct. 18 (TYO): Nagaland nung aliba nüburtem den Eid-E-Milad benjongmung salem lemsateper, ta Assam aser Nagaland Governor, Prof. Jagdish Mukhi-i sangdong ka ajanga ashi.

benjong ka lir. Kati ka atema aser talisa teyari nüngdaka alir aser makamaiter dang temeim sayua iba temeshi anogo amunger, ta Governor Jagdish Mukhi-i ashi.

Asenoki COVID-19 protocol tem sülen anidaka iba Eid-e-Milad benjong ya mungti arungma, ta paisa ashi.

DC Mon ajanga PMGKP kübok teyari agütsü



Deputy Commissioner, Mon ajanga October 16, 2021 nü "Pradhan Mantri Garib Kalyan Package: Insurance Scheme for Health Workers Fighting COVID-19" kübok sen 50,00,000 agütsütsü ta metetdaksüba shidi agütsüba noksa nung angur.

Dimapur, Mongputeni/Oct. 18 (TYO): Primary Health Center (PHC) Naginimora, Mon nung healthcare worker ka mapa inyakba mapang COVID-19 agi asüba mechi par kinunger nem Deputy Commissioner, Mon ajanga October 16, 2021 nü "Pradhan Mantri Garib Kalyan Package: Insurance Scheme for Health Workers Fighting COVID-19" kübok sen 50,00,000 agütsütsü ta metetdaksüba shidi ka agüja liasü.

COVID-19 agi shiranga aliba anepalur healthcare nung inyaker dak metaloka alir nem teyari agütsütsü mechi India sorkari "Pradhan Mantri Garib Kalyan Package: Insurance Scheme for Health Workers Fighting COVID-19" ya April 24, 2021 nung tenzüc, ta Deputy Commissioner ajanga ashi.

Iba sen ya healthcare nung inyaka lia asüsang kinungtsü indang bank account nung indang indanga inoktsü.

COVID-19 agi shiranger anepalutsü atema sorkari tenüng teta amshiba community health worker aser private health worker tem densema healthcare agütsür ajanga nem iba scheme ya ajanga sen lakh 50 agütsür.

State tesem ajungalen World Students' Day mungogo



October 15, 2021 nü State tesem ajungalen World Students' Day amungba noksa nung angur.

Dimapur, Mongputeni/Oct. 18 (TYO): National Legal Services Authority kübok Nagaland State Legal Services Authority ajanga Azadi Ka Amrit Mahotsav aser Legal Services Week nung shilem ka ama October 15, 2021 nü District legal Services Authorities nung World Students' Day munga liasü.

Iba anogomung ya 'Right to Education Act' nung ajemdaker Legal literacy clubs, law students, school, college amala nung rangloker munga liasü.

PHEK : Phek District Legal Services Authority ajanga iba sentong ya Phek Government College nung ayongzüka liasü, kong Neiwe Mero, Assistant Professor, Department of Economics, PGC ajanga iba anogomung indang jembi, Thomeweu, Panel lawyer, Phek DLSA ajanga Right to Education Act 2019 nung ajemdaker jemba liasü.

Iba sentong nung Vice President, PGCSU menden liasü aser kaketshir 40 arua aden.

DIMAPUR : Iba anogo nung Dimapur District Legal Services Authority ajanga City Law College, Dimapur nung azüngerter den sentong ka agia liasü, kong panel lawyer Moatila Ao ajanga Right to Education Act indang jembi aser Principal, CLC Leonard Aier ajanga tarur pela agizükba o jemba liasü. Iba sentong nung Sangto Longchar, Dimapur DLSA, Project Assistant menden liasü, kong kaketshir 30

arua shilem agi.

ZUNHEBOTO : Zunheboto District Legal Services Authority ajanga World Students' Day nüngtem nung St. Peter Hostel, Amphoto Colony nung St. Anthony School indang Legal Literacy Club den sentong ka ayongzüka agia liasü.

Iba sentong nung Tovi Z Yeptho, Project Assistant ajanga Right to Education aser kaketshir dak sendakba danga legal rights indang jemba liasü.

WOKHA : Wokha District Legal Services Authority ajanga World Students' Day nüngtem nung Government High School Wozhuro aser Green Valley School, Wozhuro den awareness programme aser Speech Competition ayongzüka agi.

Iba sentong nung Para Legal Volunteer Zujano Kikon-i Right to Education, Health & Family Welfare Schemes amala onük nung jemba liasü.

Green Valley School nungi Tumchobeni Km, Green Valley School nungi Soyingro Khuvung aser Government High School Wozhuro nungi Lideno Nnullie nungertemi tetoktepba nung takong nua liasü.

Iba tetoktepba nung PLV Janbenthung Nnullie aser GHS, Wozhuro nung tesayur Lokyoni Odyuo na tetendanger liasü.

TUENSANG : Tuensang District Legal Services Authority ajanga Government Primary School station 'B' Shamator nung sentong ka ayongzüka liasü.

Para Legal Volunteer Tsurito-i Right to Education onük nung jemba liasü. Iba sentong ya PLV Thsangtong aser Tsurito nati ayongzüc, kong GPS tesayur Kihomong ajanga tarur pela agizükba o jemba liasü. Iba sentong nung kaketshir 35 dena liasü.

KOHIMA: Kohima District Legal Services Authority puri World Students' Day ya Kohima Law College, Kohima nung munga liasü. Iba anogomung nung Vimeno ajanga Right to Education Act indang jembi aser Toshi O Longkumer, Advocate, Guwahati High Court, Kohima bench ajanga Professional Ethics & Art of Advocacy indang jemba liasü.

Pai kaketshirtem dang tzüzüng-özüng amshiyim tajungtiba nung angazüktsü ajungshi aser ajaki akumtsübutüsü yimya tajung amshitsü ayongzüka liasü.

Panel lawyer Atila Pongen-ia legal services inyaksangshi indang lemsatepa liasü.

MOKOKCHUNG : Mokokchung District Legal Services Authority ajanga World Students' Day nüngtem nung sentong ka Mokokchung Law College den külemi agia liasü aser MLC Legal Services Clinic ka katsu. Iba sentong nung college nungi para legal volunteer tem dang iba clinic nung yariteptsü mapa agüja liasü.

Maneni college temeket nung tebor jungdaktsütsü atema nara aser süngdong tema liasü.

NSCN/GPRN ajanga Atoka Kinny asükhu lemsatep

Dimapur, Mongputeni/Oct. 18 (TYO): Tia maka October 17, 2021 aonung tsükchir kabu nung Aichisaghe nungi Atoka Kinny, Additional Secretary, Central Secretariat asüba atema NSCN/GPRN-i mang ayimer, ta MIP, NSCN/GPRN sangdong ka ajanga ashi.

nokdakba ya Naga nungter otsü nung teti alitsü.

Pa asüba ajanga Naga nungter tasü tait aser Naga lima meimba lanur ka samaogo aser pa asüba ajanga tawa adokba mapang talangka menembangtetsü.

Asür Atoka ya 2007 küm linük tenzüc wadang nung tenüng zülüok. Naga nüburtem asoshi pa takum bendanga agütsür inyak aser pa temolungtetba nung kodanga lulaa makum aser tasünü tashi bendanga agütsür linük tenzüka liasü, ta sangdong ajanga ashi.

NSCN/GPRN ajanga Asür Atoka Kinny'er kinungertem den asükhu lemsateper aser Tsüngremi parnok nem tashi aser tasü tait molungsentsü agüjang ta sarasademtsür. Asür tanüla nung teti tatem maka tesunep agüjang ta sarasademtsür, ta NSCN/GPRN sangdong ajangasa ashi.

Pai linük asoshi tasü ita

Security Forces temi Kezo Basa yimtsüng nung süngdong atem

Dimapur, Mongputeni/Oct. 18 (TYO): HQ IGAR (North) kübok Assam Rifles, Kohima Battalion ajanga "Clean and Green Nagaland" omen nung ajemdaker October 18, 2021 nü Kohima district kübok Kezo Basa yimtsüng nung süngdong atemba sentong ka ayongzüka liasü.

temolung tali agütsüdaktsütsü nükjidong nung iba sentong ya ayongzüka liasü.

Iba sentong nung Assam Rifles temi süngjang adangba süngdong 150 lema agütsü. Iba sentong nung Assam Rifles tem den civilian 25 shi lungjemer süngdong tema liasü.

Libajen wazüka ayuba tsütsü yimdaklirtem ajungmesotsü aser libajen nung

Assam Rifles temi iba ama sentong ayongzücba atema yimtsüng nung lenirtemi pelaba lemsatepa liasü.

Imphal East district nung prangpong-injang aika ngutet



Imphal, October 18, 2021 (Agencies): Manipur kübok Imphal East district nung police-i prangpong-injang aika ngutetogo.

Imphal East district kübok Andro tesem nung parnoki prangpong-injangtem ngutet.

Chief minister Biren Singh tetuyuba kübok Assam Rifles aser Manipur Police külem telok kati iba tesem mita ao.

"Andro tesem nung prangpong-injang kanga khatokba osang angashiba agi, ni district police dang teinyaktsü inyaktüsü shiogo. Manipur police aser Assam Rifles külem telok kati mita ao" ta CM Biren Singh-i ashi.

"Iba mapang parnoki AK Rifle ka den magazine, 9 mm pistol ana, wireless set ana, AK rifle ammunitions 15 nos.,

9 mm ammunitions 21 nos., detonators 18 nos., aser injang tazüing 15 nos. nguteta liasü" ta paisa metetdaksü.

Ajisüaka, iba dak sendakba nung nisung shinga mapu lir, ta CM Biren-isa ashi.

"Prangpong-injangtemji tanep 9:35 ako meta ngutet" ta Manipur police-ia metetdaksü.

Piles Anepaluba - Kabiraj dang alakteta pelaba metetdaksür. Piles, Fistullah, Gastric, Sinus aser Tonsil-Athjma agi ni kangshia liasü aser Rectum nungi azü alu dang mapang talangka item timtem nungi junga taneptsü mangu. Ajisüaka, tang **Kabiraj H. Umar Chesam** contact no. 8416087414 / 6909717178 National awardee H. Umar Chesam

Address: Burma Camp 2nd Police point opp. tetuyuba nung anidaka surgery kecha magii (non-surgical) anepalur anogo ishika tsüngda ni taneptsü ngua liasü aser iba sülen tanü tashi kü temang nung timtem kecha mali. Time: 9 AM - 5 PM

Yours sincerely - L. Kath Rengma, Add: Kohima



Pradeep Majhi aser Gautam Dhanwar nati Congress toktsü

Guwahati, October 18, 2021 (Agencies): Taoba mapang Assam minister Prithvi Majhi aser Rameswar Dhanuwar na jabaso ana densema Congress lennir kari Deobarnü Congress toktsür Bharatiya Janta Party (BJP) nung denogo.

Congress lennir Prithvi Majhi aser asür Rameswar Dhanwar na jabaso Pradeep Majhi aser Gautam Dhanwar naprongla Deobarnü BJP nung denogo.

2016 Assembly elections nung Patacharkuchi Assembly menden atema Congress candidate Sailen Kalita-ia BJP nung denogo.

Hengrabari kübok Assam BJP headquarters nung sentong ka agiba mapang Bodoland People's Front (BPF) MCLA Rajiv Brahma aser Prabhat Musahari naprongla BJP nung aden.

Vajpayee Bhawan, Hengerabari nung iba sentong agiba mapang, Assam BJP president Bhabesh Kalita-i züngsem tasen ajak pelashishia agizük.

Assam Assembly menden nung aruya aliba by-polls agitsü lia Congress aser BPF lennirtem BJP nung adenba ya

telok atema kanga tongtibang asütsü.

"BPF maparen tatembanglen kati arudar. Baksa district nung BPF pusemer mali kümogo" ta Assam BJP president Bhabesh Kalita-i ashi.

"BTC nung MCLA ka den BJP-i mapatong ka tenzükogo" ta Kalita-i shisem.

"Tang, MCLs züngsem ishika BJP nung denogo. Parnok BJP nung adenba ajanga Bhabanipur, Gossaigaon, Mariyani aser Thaowra tesem nung mapa aika nungshia aotsü. BPF MCLAs timbaka ano BJP nung adentsü sentong lir," ta Kalita-i ashi.

Ajisüaka, Assam BJP President-i, Pramod Boro ya Bodoland Territorial Council (BTC) indang chief executive member (CEM) ama alitsü, ta jangjatsüogo.

Tawa, Sipajhar kübok Garukhuti lendong atalokba mapang AIUDF president Badruddin Ajmal-i ashiba o dak sendakba nung, Kalita-i, "Badruddin Ajmal asalentong nung sorkar atsür modaktsütsü; iba tesem nungi nüburtem maneni meindoktsü," ta ashi.

Assam Sorkari TET tesayurtem tanaben asadangshitsü

Guwahati, October 18, 2021 (Agencies): Tawa tanü tiyazü Teachers' Eligibility Test (TET) adokba dak sendakba nung ajemdaker tesüiba küm pungo nung mapai aniokba TET-qualified tesayurtem tanaben asadangshitsü atema Assam sorkari maparen inyakdar.

State directorate of Secondary Education-i October 22, 2021 anogo tashi TET-qualified teachers' testimonial nung report tejangja ka agütsütsü asoshi district 21 indang inspectors of schools (IS) ajak dang tetuyuba agütsüogo, ta ketdangsür kati ashi.

Tesayur aika tiyazü TET certificate bener Bodoland Territorial Region (BTR) kübok Chirang, Baksa, Udalguri aser Kokrajhar district kübok school balala nung inyaka arudar ta department-i kuli nguteta lir.

State Education Department ajanga bushitepa aoba mapang

nisung kar tiyazü TET certificate bener tesayur mapa anguba maparen tamai adokdaksüba sülen, iba maparen dak sendakba nung bushisüngdangtsü atema Criminal Investigation Department (CID) nem mapa nüngloktsü.

Tiyazü TET certificate bener mapa angur tesayur 36 shi CID-i puogo. Iba ken o dak sendakba nung maneni bushisüngdangtsü atema ano Special Investigation Team (SIT) ka tentetsüogo.

Ketdangsür sangdong ajanga angazükba agi, October 2016 aser September 2021 tsüngda high school, higher secondary school aser high madrassas balala nung state education department-i TET-qualified candidate ama post-graduate tesayur (PGTs) aser graduate tesayur (GTs) 5,592 shi mapa nung aniok. Parnok rongnung GTs 5,105 aser PGTs

487 shi liasü.

2016-2017 mapang mapa nung aniokba TET tesayur 73 nungi PGTs 44 aser GTs 29 asütsü. 2017-2018 küm tsüngda mapa nung aniokba TET tesayur 1,223 rongnung PGTs 337 aser GTs 886 dena lir.

2018-2019 küm TET-qualified PGT tesayur 104 shim. Iba sülen 2019-2020 küm tesayur ka danga meshim. 2021-22 küm TET tesayur 4,192 nungi tesayur 4,190 shi GTs aser tanüingba anaji PGTs lir.

Education department-i inspector of school ajak dang tesayur mapa nung aniokba (appointment) anogo, TET ajangtetba küm, TET ajangtetter candidate indang roll number, TET nung marks percentage, candidate tem indang contact number aser tang parnok teinyakdak aliba school tenüngtem agütsütsü asoshi tetuyuba agütsüogo.

NLFT commander ka temai adok



Agartala, Mongputeni/ October 18, 2021 (Agencies): Tripura nung telungpur telok National Liberation Front (NLFT) indang senior commander Jaiba Kaloi temai adokogo. Border Security Force matsüngdang Jaiba temai adok.

Küm 23 tashi iba telok nung inyaka arur sülen, NLFT lennir Jaiba tamai adoker asütsü.

"Tripura indang Gomati district kübok Ompi nung alir NLFT(BM) telungpur Jaiba Kaloi @ Litan Jamatia @ Chalai, shiba NLFT nung Lieutenant ka liasü, tanü (Hobar) Susanta Kumar

Nath, IPS, Inspector General Tripura aser tanga Senior BSF Officer matsüngdang BSF nem bendanga agütsüogo," ta BSF-i ashi.

1998 küm Jaiba Kaloi NLFT nung aden.

Küm 23 sülen, Hombarnü, Kaloi par tsürabur den ajurutepogo. 1998 küm NLFT nung dener külen nungi Kaloi-i par tsürabur den khen danga majurutep.

Security tentet balalai meranga inyakba yong, tesüiba küm ishika nungi telungpur telok balala nung telungpur jenti hadir toktsür nübur den ka küma alitsü asoshi tamai adokdar.



Centre sorkari Andaman and Nicobar Islands nung aliba 'Mount Harriet' dang 'Mount Manipur' tenüng melentsüba atema Deobarnü Manipur kübok tesem aika nung nisungtemi benjungtepogo. Nüjiso atema raraba mapag Manipur Maharaja Kulchandra Dhvaj Singh aser nisung 22 tashi 'Mount Harriet' nung puoka ayu.



TIR YIMYIM YIMOBILEM (EDITORIAL)

DIMAPUR SANGTENNÜ, MONGPUTENI(OCTOBER) 19, 2021

Yimdong light ya koda ?

Tanü putu nung temelenshi aika lir aser temelenshi rongnung electric tesangwa peria tsüklokba agi yimti aika nung amang maka teti tesangwa dang aliba temelenshi mapa aser mapang ya asütsü. Item ama yimtititem nung senzüdang, kotak lima nungbo kodanga amang maka, teti tesangwa dang alir ta sayutsüngirtemi ashiba bilemtetter. Aji oda, tanü asüng lima nungbo anüngdang dang nungibo aonungang alimaa topur tajungba angutsüsa yimti nung light tapu balala tsükloker. Iba topur ajungji meteta, tanü asüngbo asen lima nunga nisung karibo kiyir benjong ama tongtibang sentongbo anüngdang masü aonungang akar. Iba amaji electric light tesangwa agi, alima ya akhidang itaya aonung dang nungibo tesangwaba aser temenungratsü taketba kümdaktsüogo. Kasa putu nungsa süaka, ibaji asen lima masü saka tangar wainshin metetter, ochishir aser pei tetsü tasoli meimertem aliba lima aser yimtititem indang otsü lir. Parnok denji kodang asen jakla yimya aser asen yimti yimdong medemdangdir, tesempatsüka, mangmanger, nisunga mali amato, akhidang tsüraburtem kümbok milen amshiba mapang nungi talangkabo mepila reprangtetsü. Atangji, asenoki asen kidang atsükba light bill dena shitak magütsür aser light bill yanglur aser sarurtemia shitak meinyaker. Ano, nisung aikati meter box mali ser light auyaa atsüker. Iba jagi balaka Nagaland nung Power department akoksar aser yimti yimdong sangwadakja meinyaktetter. Aji agi, Nagaland nungbo, yimti yimdong ya anüngdang light yindong tejen nung süngzü tapu tapu mesanga oa aliba agi topur majung angur aser aonung street light maliba agi tetsür tanurtembo sadema mesenzütetsüsa amang nung ajemzua senzür. Iba tensa tia ya kisüng kokteta bentet nung Nagaland ya topur jungadoktsü. Tanga yimtititem nungbo kima yimdong nung azüngba electric post ya dena noksa enoka topur jungjunga yanglur, iba jagi tesangwa dang masü saka yimti topur jungdaktsür. Aji oda, tanga yimtititem nungbo, tetokteper amato, kiyong shia nung electric yindong aser street light design balala yanglur, yimdong süa tsükloka aliba angutsü. Item ama kima yimdong nungang linütsüka, tangarbo pei yimti yimdongji pei ki aser pei atep amai bilema topur jungjunga yanglur aser kodanga memangdaktsür. Atangji, asen lima nunga yimti yimdong nung aonung light tsüklokba taa light atsüker kilen shia dang nungi sen mechimenukabo agir. Iba jagi yimti kar nung jokshia jokshia street light tsüklokja alibatem ya anepalur südi. Yimti topur ajungtsübaji, mezüngbuba nung asenok nübortem awashi temetet aser teindang nisung asütsüla. Tanabuba nung, yimti yimdong lenmang ajungtsüla aser tasembuba nung, street light yindong aser light tsüklokba yimya ajak, tesangwa agütsüra ojang ta masü, topur jungjunga kanga nendaka inyaktsüla. Talisa, Municipal Council aliba yimtititem nung ketdangsertemi yimti topur ajung tsütsü kanga süoki ia bilema inyaktsüla. Municipal aser Town council ya anepdang yimdong nung janaona aoktsü kija atema tentet masü saka yimti nung tajemtsü tzü, gari lenmang aser electric light agütsüba mapatem shitak topur junga ketdangtsütsü asoshi tentetba telen lir, anungji item teinyaktsü mapatemji meteta shisa bushitsüla aser nübortem den yaritepa inyaktsüla. Atangji, tia majung, Nagaland nung tang tashi Urban Local Bodies election magitetba ajanga center sorkar nungia yimti terenlok asoshi senotsü peria meyoker, iba jagi municipal aser town council nung ketdangsertema timatemer. Ajisüaka, center nungi sen aru maru ta mali, sen tama masü saka inyaktsü apitetba tangatetba aser shisatsü (idea) tama nungdaker. Yimti nungbo shishilemar takar aika lir, anungji pei kima lenmang aser pei kima tsükloksüba street light ama nungdak mapatemji angatetdaksüra, parnok pelashishia tenlatsü. Joko, asen lima nunga gari tajung aika senzür aser kiojena tangar adoksaajung aja yangluteta angur. Item ajakji asenok akhüm aser rongensa asütsü. Anungji, item denji sütepa asenokia asen yimti aser asen kiyong nungbo anüa kodanga malur ama, teti sangwaa alitsüsa, street light nung temulung agütsütsü kanga rongdak nungdaka kümogo.

OLEMSABANG

LGBTQI+ Tebilemstsü aser Tanü Lokti

- Matsüng Longkumer

(Yashi adok nungi...)

Spiritual issues

Tenla kidang satoka jangratema meküemteter, kechiba süra lokti-i parnok magizüker ta meteta kar. Anungji parnok Arogo nungi tanemi atsünga aor. Tsüngremi ni kechiba yamai yanglu ta tasüngdangba agi parnok sünga lir. Sayutsüngi dang meshisadangi parnok ya yongrü ka nung dang züngshia temenem nisung, mesüra atakatemba chir ta temeshi sabang nungi o kazüka yuker. Kanga dang judgemental! Anungji temenem bushia pei tanela kümzutsü melen sentepi marunü akümer. Dimapur nung Ao Arogo ka nung lanur kati kuli asüba sensaksemer kati yami lemsatep: ni kanga nendaka sentepsenshi nung tena liasü. Saka künü sannükeri tebur kati tebur ka dak salokba ya temenen ta ashi. Kanga dang aoksa aser lumia sarasadema iba jakla ya entoktsü merang saka makok. Pei sasa asütsüa khenbo bilem. Joko Sentepi maor.

Anungji sensaksemer kati yamai langzü, Arogo nung tenzüker aser deacontemi iba timtem ya rajema mangatetba ajanga junga anepalu mesüteter. Adangji parnok karbo azü nungi taso dang yongi yamai aruba lir (genetic) aser parnok melenshitsü kangabo temela masü.

Lokti teinyaktsü

Alima putu melenshia arudang arogo aser lokti nung tebilemstsütem balala ajurua arur. Tanü asen tendak ajuruba tebilemstsü tulutiba rongnung LGBTQI+ ya-a ka asütsü. Iba amala tebilemstsü ya tangar dak atalokdangbo aikati shi-shia mebilemer, saka asen atep nung chirnur rongnung kar dak kodang atalokdir, iba mapangjiang ya atangji ta ajaki yimdangi arutsü.

Asen lokti nung iba indang jembitsü mesademmer kechiba süra parnok temetem indang jembidang yimya libaru tasen amenloktsü amai temulung malemer. Anungji asen lokti aser sobaliba raksatsü mersüra menentsütsü ta bilemer. Iba yongji iba onük nung ajemdaker ocet zülubatem yimjak nung ano prokshitsü mapang madong ta sensaksemer kari ashiba nung khenbo atsütepogo.

(a) Human sexuality angatetsü nungdaker

Benshia aruba yimya nung asenoki nisung ya tetsür aser tebur dang bendanga yutsür. Anungji nungja süngla watsü, wabong, sangpang, kongro ta dang lateta yua lir. Iba tangatetba ya agi amokbanger ali nung iba telatetba nungi balaka soteter/alirtem ya tapu balaka repranger aser nisung rongnung mesükshir. Saka iba telemsa ana dak alaka soteter nisung aika lir (engraji nung gender noncomformity ta ajar). Parnok kechiba kodaser yamai adok ta bushitsü aser parnok angatetsü nungdaker. Yimya balaka nung liba-lirur ajak sakuku benshibaji tai. Kar taso dang iba yimya nung asor (biological and genetic), kar lia aodang influence südaktsür. Parnok ya ozüng mesüra tashiyim agi azüoktsü memerangtsüla, karbo mozü (medical intervention) a menüngdaker. Lokti-i item ya angateta tim leman nung pei sasep nung yaritsü nungdaker. Tat.agi WHO nunga homosexuality ya tekolok meshitak (mental sickness) ta bilem aser yamaji yaria aru saka 1992 nung dang iba ya mentel sickness nungi WHO ia entokogo.

Tsüngrem ya tetsür asü tebur? Tsüngrem ya tetsür a masü tebur a masü (genderless God) ta amanger. Anungji tetsür tebur dak alaka tanga yimya nung asortem ya Tsüngrem mesükba nung yanglu ta aikati ashir. Anungji asenoki angatetba tetsür tebur tebandang (male female binary) ya khen angatetshitsüla asü ta sensaksemer kati shia liasü. Asenoki LGBTQI+ rogo ya "biological" aser "psychological" mebendangteter anungji parnokji khenyongi dang sensatsür ta sensaksemer kati kuli agütsü. Iba tebandang ya angatetsü nungdaker.

(b) Non-Judgemental

Asenok aika dak dangar aija bilemba (homo-phobia) shisatsü lir. Kodang homo ta südir nisung aika dak tetsübu (phobia) aitba agi mulungsentsüi magizükteter (mental block aitadoker). Tesempatsü mapa indang mejembitsüla ta dang bilemer. Parnokji yamai dangar mesüra yamaji memerük libalirur ta meshisadangi o kazüka yoker. Anungji Kodang LGBTQI+ pur ya mesendoktsüla ta jembidir, parnok arogo nung satidaktsütsüba indang jembir ta dang shisatsü nung aruadoker. Item dangji homophobia ta ajar ta lenir tajung kati ashi. LGBTQI+ rogo a nisung tajung aika alitsü akok, saka parnok dang temenen/japujari mapa inyaker ta jembiba dangji judgemental attitude ta ajar. "Homosexual" aser "homosexual yimya benshir" ana ya khenyongi balala. Tanü iba aija bilemba (judgemental attitude) ya entoker parnok angatetsü nungdaker. LGBTQI+ telok nung melidangeri parnok timtem aser taküm nung ajangshiba memetetsü aser ibaji memeteti aija jembiba ya entoktsüla ta sensaksemer aikati lemsatep.

(c) Parnok angatetshitsüla nungdaker

LGBTQI+ rogo den tonga oa sensak-asemtsü nungdak ta sabang nung sensakemer aikati ashi. Parnok tai ta tangatetba shisatsü bener ali tashi, parnok timtem asenoki mangatetsü südi. Mesüra khenyongi parnokji benshiba yimyatemi mesü-mekong yimya ta jembiba tashibo, parnok asenok den salaa par tebilembatem mashitsü südi ta lenir tajung kati shisem. Tanü asen lokti nung tongtibang shilem kaji parnok yimya aser libaliru aser takümü metetsüla. Parnok junga mangatet tashi asenoki parnok den satoka melitetsü. Parnok yaritsü asoshi tamasa parnok angatetsüla. Parnok lipok dang nungi asenok den liasü, saka tanü kechiba tali adoker ta bushia Arogo aser lokti nung koma leman ka nungi anioktsü ta bushitsüla ta lenir tajung kati ashi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

CTC nung Pastoral Care aser Counseling indang kaket ka saya



October 17, 2021 nü Multi-purpose Hall, Clark Theological College nung CTC Principal, Rev. Dr. A. Temjen Jamir-i 'Pastoral Care and Counseling in Times of Pain and Loss' kaket sayatsüdüng tangokba noksa nung angur. Kasa noksa nung iba kaket zülula. Dr. Tsüknungrenla-a angur.

Mokokchung, October 18 (TYO): October 17, 2021 nü Multi-purpose Hall, Clark Theological College nung CTC Principal, Rev. Dr. A. Temjen Jamir-i 'Pastoral Care and Counseling in Times of Pain and Loss' ta ser kaket ka meshiteta sarasademtsüba sülen sayatsüügo.

Iba kaket ya CTC nung department of Christian Ministry nung Associate Professor Dr. Tsüknungrenla-i zülü.

Discipleship Bible College (DBC) aser Programme for Theology and Culture in Asia (PTCA) nati adokba Pastoral Care and Counselling in Times of Pain & Loss kaket ya PTCA

Contextual Bible Study Series-5buba lir.

Iba sentong nung jembidang kaket zülur, Dr. Arenla-i, taküm January ita nungi June ita tashi nung North East Christian University (NECU) aser International Ministries of the American Baptist Churches (IM-ABC) nati ayongzuka "Christian Witness in Times of Covid-19 and Beyond" omen nung ajemdaker agiba Virtual Leadership Empowerment Training Programme dak sendakba nung iba kaket ya zülüügo, ta metetdaksü.

Iba kaket nung ocet 14 densema lir aser itemji shisashirtem aser Arogo

lenirtemi agütsüba lir. "Coronavirus ama wara mapang aser iba dak sendakba tanga khuret balala mapang nung Christian caring ministry atema iba kaket nung tesayubatem lir," ta lai metetdaksü.

Laisa iba kaket sayatsü atema maongka agütsüba atema CTC Principal aser CTC pur ajak dang pelaba lemsatap.

DBC, PTCA tenüng nung Contextual Bible Series General Editor, Prof. Wati Longchar-i, iba kaket adoktsüsa tenla tajung agütsüba atema Pastor N. Lipok Jamir aser Diphupar Ao Baptist Arogo nung züngsemtem dang pelar, ta lemsatapa liasü.

UP nung anti-conversion ozüng kübok pastor tenet jail nung puok

October 18, 2021: October 10, 2021 nü Uttar Pradesh nung sarasadem sentong ka agiba mapang nung police-i pastor tenet apu; parnok anti-conversion ozüng alema inyakogo, ta parnok nem tai tongloktsü, ta International Christian Concern-i metetdaksü.

Pastor temi ozüng alema adenshi, ta tai tongloktsü aser tang tashi jail nung puoka lir.

Pastor tem atema lawyer, Ashish Kumar-i, "Onoki bail temepishiba agütsütsü, aser kobi melii parnok jail nungi chioktsü onoki imlar," ta metetdaksü.

October 10 nü Uttar Pradesh kübok Mau district nung Protestant pastor temji apuba sülen tang judicial ket nung lir.

Police-isa kasa sentong nungji adener Khristan 50 pua liasü saka tesülen chiok. Police-isa Prayer House ka nun ana apuba sülen police station nung tena dang ghonda aika asüngdangyaa liasü.

"Police-i nun ana anema-a ken o benoknüa liasü, ajisüaka pastor tem jagi police dang sarasadem sentong nungji

tenabo maden anungji tenabo chiokang, ta ashiba nung ajemdaker tenabo chiok," ta Varanasi nung amenoka aliba Indain Missionary Society nung züngsem, putir Anand Mathew-i metetdaksü.

October 12 nü osangbenertem den jembidang pai, "Pastor tem nem tai tongloktsüba ajakji tai. Iba ya Khristantem anema inyaktsü asoshi asalentong yangluba shilem ka lir. Yogi Adityanath leniba nung sorkar akümba sülen nungi state nung Khristantem anema inyakba aser reshikangshiba kanga bulua kümogo," ta metetdaksü.

Adityanath ya Hindu seer ka aser Bharatiya Janata Party (BJP) züngsem ka lir, aser 2017 küm March ita nung pai Uttar Pradesh Chief minister inyaktsü atema tenangzükba agia liasü.

Mathew-isa, "Taruba assembly election magi tashi onok anema inyaktsü," ta metetdaksü.

State nung Khristantem aser Muslim nungertem amakba ya tamangba yimsü nung ajemdaker telemsa

adokdaksütsü aser ibaji ajanga BJP tajangzük angutsü nukjidong nung inyaker; Yogi leniba nung sorkar akümba sülen Uttar Pradesh nung Khristantem anema inyakba tatalokba 384 tashi lir, ta paisa metetdaksü.

State nung takoksa angurtemji timbaka Protestant Khristantem lir, ajisüaka Khrista temang nung külem shilem ka ama Catholic Khristantemi Protestant Khristantem pusemstüla, ta putir Mathew-isa ayongzük.

Nütsüng million 200 aliba state- Uttar Pradesh nung Khristan nütsüngbo shilem 0.18 dang lir saka Khristantemi Hindu nung Khristan yimsü dangi meyipdaksür, ta tai tonglokja Khristantem anema inyaker.

State nung Arogo lenirtemi ashiba agi, state police-ia takoksa angurtem yaritsü melen aibelenertem ang pusemer.

Pastor kati, "Aiben police-i onoki benokba ken o agizüktsü memelunger. Ibaji ajanga onok anema inyakertem temelung uludaksür, aser ibaji ajanga onok akoksar," ta metetdaksü.

ANO GO ABEN TSÜNGREM DEN

Ajak tesülen tokjang

Aser Pai parnok dang ashi, Kü sülen anidakang aser Ni nenok nisung apurtem küm daksüdi.

Mathi 4:19

Yohani Yisu baptitsür külen, pai nütsüng ana dang Yisu kong lir metettsü asoshi pa sülen aotsü ashi. Ana rong nung kabo Andria liasü. Yisu ajurua Pa den jembir külen Yohani parnok dang Khrista sayu ta parnok angatetta aru. Idangjisa Andria teti Simon Yisu dangi anir aru. Tesülen Yisui ango pur adianu ana dang "Kü sülen anitakang" ta ashi. Pai parnok dang parnok akaba ajak tesülen yujang ta parnok tajangzük anguba mapa, parnok chiyongtsü aser parnok tehua- parnok Pa nütsüngtem akümtsü asoshi. Idangji Yisui parnok koda amshitsü parnok dang ashi. Pai parnok temetetba ango bushiba nung masü saka nisung tanelatem bushiba nung amshitsü ta parnok dang ashi. Tesüiba nunga parnok Yisu ajurua liasü aser Pa kechi koma nisung parnok metetta liasü, Pa sülen anidakra Pai parnok taküm teti asoshi melenshitsütsü parnok mulungtet.

Asenok asoshi lessonji tanabuba tekong nungjia sayur. Idangyongjisa parnok parnok zütsük toktsü aser Pa sülen anidak. Parnok Yisui ajaba nung tashi anga, parnok akaba ajak toktsü. Tanü Yisui asenok shia ajar. Tanü Pai asenok tejangraba toktsü daksüner aser Pai asenok taküm agütsüba nung ranglokdaksüner. Iba nung shilemji shirnoki Yisu memeteti lir parnok Pa den teti tatem maka taküm aliba osang tajung lemsateptsübaji lir. Tanü na aser ni nisung apur akümtsü akok. Tasüngdangbaji ya, asenokia Andrew aser Peteri ama, idangjisa Pa sülen anidaktsü shimtetsü asü?

Tsüngrem, tanü ni nisung apur ka asütsü Ne dang sarasademer. Ne taochi aser yimlibilem lemsateptsü mapang tajung agüjang. Amen.

Aoyimkum Baptist Arogo nung I. Asenla Jamir Ordain süogo



October 17, 2021 nü Aoyimkum Baptist Arogo nung ABAM-i I. Asenla Jamir Ordain sütsüba mapang tangokba noksa nung angur.

Dimapur, October 18 (TYO): I. Asenla Jamir-i Arogo la dak temulung süa (Mopungchuket) akümü piyong ABAM dang la Ordain asütsü Tsüngrem tenzüktsü asoshi asoshi asüngdangba ama mulungteta October 17, 2021 ABAM ajanga Ordination anogo nung ABAM ajanga mapa kanga junga renemtsü nung Arogoi kanga pelar," ta la taküm Tsüngremer wadang asoshi bendanga ayuba Ordination Council Rev. 'Ordination' sentong agiogo, ta Yashila Jamir, (Chairman) Rev. Aoyimkum Baptist Arogo nung Lanuyanger, Rev. Dr. Temjen pastor, Rev. I Temsu Aier-i Ozükum, Rev. Lipok Pongen sangdong ka ajanga aser Rev. C. Moayanger Jamir. metetdaksü. Tang nungi la dang Rev. I.

"Lai Arogo balala nung Asenla Jamir ta ajatsü. tenzuka aruba sülen tang Tsüngremi la taküm, kibong Aoyimkum Baptist Arogo nung aser tenzükba wadang Associate Pastor Women küm Tsüngremer sentsüwangshi 17 tashi bendanga agüja inyaka asoshi tali moajangma, ta arudang (Tsüngremer tenzükba pastor-isa lemsatap.


OLONG PAITEP # 5970

1						2				3
								4		
5		6				7				
8										9
								10		
				11		12				
			13							
14						15				
			16							

TIPIEN		LANGTSÜNGLEN	
1. O jembitsü tashi	- 8	1. Tepok telung nung shilem ka	- 7
5. Súngjang tapu ka	- 5	2. Tamajung aküm	- 5
7. Tekanük nung enokba	- 5	3. Chi den külemi achiba	- 3
8. Teka amtep	- 5	4. Meimchir alimai aruba	- 3
12. Tzüc asendak	- 5	6. Laishiba nung ayong ka	- 4
14. Tsünpang tema aliba	- 5	9. Tarutsü nükla	- 7
15. Ken atenba yimya	- 5	10. Tamendakdak/Nükjidong	- 4
16. Asangur	- 8	11. Tenük-telen mejungi aküm	- 5
		13. Terok nungi adokba	- 3
		14. Meimchir telemsa	- 3

OLONG PAITEP # 5969 TELANGZÜBA

TIPIEN :		LANGTSÜNGLEN :	
1. Taa, 3. Teküm, 6. Aibelen, 7. Aut,		1. Tai, 2. Asensor, 3. Tanü, 4. Kua,	
9. Ajizük, 10. Ojala, 11. Semer,		5. Mitsüktsü, 6. Azübenshi, 8. Lah,	
13. Sen, 15. Kiocksü, 17. Itsük, 18. Kar.		9. Jangkok, 12. Akok, 14. Nashi,	
		16. Sür.	



TAKÜM SARU NUNG LEMTETBA UNGER ALOKBAL YIMYIM AYIMOKTSÜR:

Warakla : Taküma saru nung kechi sa lemtetar jee ayimdar angang.
Alokba : Hooi yimer ajak merungrongi anga liang ni, taküm saru nung lemtetba ayimoktsür.

1. Tetsür shinga tepi tazüng tashi tola kisüng semer azü ajunger menaktepa yimdong nung mejajatsü.
2. Asangur shinga tejemi ngüa longpant sepzüka lua semer mesenzütsü.
3. Chidentsür shinga shishilemba dang tsümar nem temang nung mememshidaksütsü.
4. Covid 19 atemer tepang nempanger kinüngtsü kinüngbu yutsür tangar den apangteper mejajatsü.
5. Kinüngtsü Kinüngbui memeteti INTEREST nung Sen apur kimong lumong me yokshitsü.
6. Taküm piokji tenlaki dang asütsü ajaki angazükang amshiang ni

Temetetsü : Arogo mungdang mongji aser sayutsüngi aodang tedong techi masü Tsüngrem tanüla aser shisa tajung akar arogo ajangzüksüla nisung anir jajatsü. Shiri aibelendir Tsüngrem tsüngdang pei sa nokdaksü ajaki angazükang oji.

Lilir - SMS

TANÜBO NAI LANGZÜANG

Q. G20 nung linük kwika dena lir?
 A.20 B.19 C.18 D.17

===== (Taruba adok nung onoki langzüksü)

YASHI ADOK TELANGZÜBA: October 09, 2021

AO OSHI ANGAZÜKDAK:
TANÜ ANGAZÜKTSÜBA OJANG

Lashi
 (v) sentsü prangshi (gleam)
 * Tanurtemi aina **lashiba** agi onok tenük arü.

Lashi
 (v) shibanga aliba lapok (open)
 * Kütsüi ki ajak **lashia** yutsür ao.



Happy Birthday

TENÜNG : WALUENLA PONGEN
 Tasoba anogo : 19th Oct.2020
 Küm : Ka (1)
 Talidak : Kashiram

Tsüngremi jala moatsür küm ka renteta Pa taochi tashi agi anir arunung Tsüngrem tenüng asanger. Asen teyanglur Tsüngremi ano jala anema aliba den arishi anogo temjena moajang ta sarasademtsür.

- Temeim oja, oba, odi, otsü, obu & kinungertem.



NAI-A YA METETTER MA

- OCTOBER 19 NUNG ASOR TONGTIBANG NISUNG KAR:**
- Abolitionist Cassius Marcellus Clay - (1810)
 - Motion picture pioneer, Louis Lumiere (1862)
 - English spy novelist John Le Carre (David Cornwell) (1931)
 - Feminist Patricia Ireland (1945)
 - Singer Jeannie C. Riley (1945)
 - British writer Philip Pullman (1946)
 - Boxer Floyd Mayweather Sr. (1952)
 - Actor Sunny Deol (1956)
 - Singer Jennifer Holliday (1960)
 - Former heavyweight boxing champion Evander Holyfield (1962)
 - Actor/director Jon Favreau (1966)
 - Actor Rebecca Ferguson (1983)
 - Comedian Jamie Lever (1987)

SUDOKU # 6011 TELANGZUBA # 6010

4	9				5	3	8	2	5	7	4	1	3	9	6			
7			8			2	4	6	1	9	5	3	2	7	8			
			5		7		9	7	3	8	2	6	1	5	4			
	2	9			4	6	1	5	3	4	2	6	9	7	8	1		
9	6		8		7		3	5	6	8	9	5	1	7	4	2	3	
5	3		2	6			7		7	1	2	3	8	4	9	6	5	
3			5				8	4	3	5	8	4	7	2	6	1	9	
2		6	4	1			7	9	2	4	6	1	9	8	5	3	7	
			7	9			5	2	6	1	9	7	6	3	5	8	4	2

OJANG LUTEP # 5556

MEYTEONG :

DEMMEMEBBA :

AAM :

KTLOI :

GNUN :

SUNNIG :

ISHA :

ILEMTEBBA :

LABALA :

IRAL :

OJANG LUTEP TELANGZÜBA # 5555

ASEN AKABA NUNGI TIMTEMER DEN LEMSATEPBA AJANGA ASEN SENSAKER MAKÜMITSÜ

TAN HOPTA ATEMA - KOMA SÜLA ?

Q. Tang amai Nagaland nung oposition telok mali ser assembly election agitsü mapang tonga arununga koma süla?



Amritsar, October 18, 2021: October 3 nü Lakhimpur Kheri nung aluyimertem menüngsetba ken o dak sendakba nung Union Minister, Ajay Mishra apusüla, ta takhangba agüja Hombarnü Amritsar nung aluyimertemi train lenmang mokdang longkak aitba noksa nung angur.

India aser Israel na tsüngda angati shishilembatsü atema jembitsü

New Delhi, October 18 (Agencies): Hombarnü India aser Israel nati Free Trade Agreement (FTA) tezüngzüktep agitsü atema taruba ita nungi jembitsü.

Israel Foreign Minister, Yair Lapid den senden amenba sülen osangbenertem den jembidang India External Affairs Minister S Jaishankar-i, "Iba tezüngzüktep atema jembibaji sangküm June ita tashi nung tembangsü," ta metetdaksü.

India-i aniba International

Solar Alliance nung Israel-a densemogo aser iba atemaji Jaishankar aser Israel Energy Minister Karine Elharrar nati tezüngzüktep agia liasü.

Coronavirus wara lia linük ana tsüngda nüburtem senzusempongtsü atema India aser Israel nati vaccination certificates agizüktsü atema bangjem.

Amongnü Jaishankar Israel tonga oa liasü; pai Israel Tir, Isaac Herzog aser Ato kilonser, Naftali Bennett nata ajurutsü.

Paisa Israel nung nüngtugu

shisashirtem, shishilembartem aser India-Yihuda nungertem ajurua jembitsü sentong lir.

2017 küm July ita nung Ato kilonser, Narendra Modi-i Israel semdangba ajanga India aser

Israel na tsüngda tesendaktep ano tajungba kümogo. Iba mapang nungjagi tenzüka linük anati lenla aika nung amalitepa inyaker; item rongnung innovation & research aser 'Make in India' mapatong densema lir, ta Ministry of External Affairs-i sangdong ka ajanga metetdaksü.

Totzü jenjang maneni atuba atema Congress-i sorkar aitsür

New Delhi, Mongputeni/October 18 (Agencies): Gari totzü jenjang maneni atuba atema Hombarnü Congress Party-i Centre sorkar aitsü; Congress lenir Rahul Gandhi-i, Centre sorkari saru rakzükraakter, ta aitsü.

Airlines dang ayokba aviation turbine fuel (ATF) dang nungi gari totzü rate timba agi ayoker, ta Congress party-i aitsü.

Congress lenir, Priyanka Gandhi Vadra-ia, sorkari 'hawai chappal' agirtema tayimsü nung senzüdaksütsü, ta nangzüka liasü, ajisüaka sorkari petrol aser diesel jenjang kanga atuba ajanga sensakertem gari nung senzüsü atema-a kanga saaka kümogo, ta aitsü.

Rahul-i Hindi oshi agi twitter ajanga, "Modi'er medemertem

tajangzük angutsü atema ashiodaktsüba nüburtem den ni densema lir, aser parnok atema ni maneni ola adoktsü. Saru rakzükraakter, anenang," ta metetdaksü.

Priyanka Gandhi-ia Hindi oshi agi twitter ajanga, "Hawai slipper agirtema tayimsü nung senzüsü ta nangzük. Ajisüaka tangbo BJP sorkari petrol aser diesel jenjang kanga atuba ajanga hawai slipper agirtem aser sensakertem atema gari nung senzüsüa tasak kümogo," ta ashi.

Congress-i parnok indang official Twitter handle ajanga, airlines dang ayokba ATF dang nungibo gari totzü jenjang timba kümogo, aser iba ya ajanga Modi sorkari ayaba kuli sayur, ta metetdaksü.

Amongnü Petrol aser diesel litre shia poisa 35 atuba sülen airlines dang ayokba ATF dang nungibo gari totzü rate shilem asem agi timba kümogo.

Linük yimtiba, Delhi nung tang petrol litre ka nung sen 105.84 agi ayoker aser Mumbai nungbo petrol litre ka nung sen 111.77 kümogo.

Linük rongsenkettsüng yimtiba, Mumbai nung diesel litre ka nung sen 102.52 aser Delhi nung diesel litre ka nung sen 94.57 kümogo.

Airlines dang ayokba aviation turbine fuel (ATF) Delhi nung litre ka nung sen 79 saka gari nung atsükba petrol bo litre ka nung sen 105.84 agi ayoker. Petrol aser ATDF na medemdangra petrol jenjang shilem 33 agi timba.

Gurmeet Ram Rahim Singh taküm piyong tepuokdak ayutsü


New Delhi, October 18 (Agencies): 2002 küm Ranjit tepsetba ken o dak sendakba nung Sacha Sauda tongti, Gurmeet Ram Rahim Singh taküm piyong tepuokdak ayutsü obendang agütsüogo; Ranjit ya taoba mapang Rahim Singh indang manager liasü.

Kasa ken o nungsa tai tonglokja alir nisung pezüa taküm piyong tepuokdak ayutsü obendang agütsü.

Panchkula nung special CBI court kati Rahim Singh dang senchi lakh 31 aser tanungba nisung pezü dang senchi 50,000 achi.

Central Bureau of Investigation (CBI)-ibo Rahim Singh nem tasüba temerenshi agütsüsüla, ta benoka liasü saka Ram Rahim Singh-i Rohtak jail nungi video conferencing ajanga pa dang taochi sayuang ta mepishia liasü.

October 8, 2021 nü court-i 2002 küm Ranjit tepsetba ken o



Gurmeet Ram Rahim Singh

dak sendakba nung Singh den tangar nisung pezü aija liasü.

Taoba mapang manager Ranjit ya 2002 küm khaset. Dera headquarters nung Rahim Singh-i tetsürtem dak tashiyim mapa inyaker, ta tai tongloktüba shidi ka prokshiba atema Ranjit dak melung melemi liasü.

Lendong nokdangtsü atema Hombarnü Rahim Singh nem temerenshi obendang agütsüsü jakdang Haryana kübok Panchkula district nung curfew ozüing tama benoka liasü.

Tangalen nungi arua aayanger-temi Kashmir toktsür jenshidar



Srinagar, October 18, 2021: Tawa Kashmir nung kiralongrartemi tanga state nungi arur bendangertem aika tepsetba ajanga bendangertemi Kashmir toktsür ajentsü atema railway station ka nung train ataba noksa nung angur.

Srinagar, October 18 (Agencies): Tawa Kashmir nung tanga state balala nungi arua aayangertem aika kiralongrartemi tepsetba sülen tetsübu nung bendanger noklang aika jenshiogo aser ketdangsertemia aayangertem aika tekümükdak tesemtemi anir ogo, ta Hombarnü security ketdangsertemi metetdaksü.

October ita tetenzüklen nungi tenzüka tang tashi nung Kashmir nung kiralongrartemi civilian 11 tepsetogo aser item rongnung tangalen nungi arua aayangertem nisung pongu densema lir.

"Onoki aayangertem meyrjang aika kümzüka alitsü atema ainshidaksüogo aser parnok kidangi meyrpa otettsü atema onoki achaayangtsüdar," ta police ketdangser kati metetdaksü.

Ano tesem aika nung security sepaitemi patrolling tenzüko.

Amongnü Kashmir kübok Kulgam district nung kiralongrartemi Bihar nungi arua aayangertem dak injang khaloktsüba mapang nung nisung ana asü aser ka yirua liasü.

Tang Kashmir nung bendanger aayangertem meyrjang aika aluyimba aser kiojen yangluba maparen inyaker saka tangbo parnoki Kashmir nung alitsü tsübur.

October 5 nüa kiralongrartemi Kashmiri pandit, Makhan Lal Bindroo khasetba sülen ghonda ka tsüngda Bihar nungi aruba Hindu nung ka khaset; iba sülen Bandipora district nunga Muslim nung taxi anishir, Mohammad Shafi Lone khaseta liasü.

Iba sülen anogo ka lir kiralongrartemi school ka nung principal Sikh tsür, Satinder Kaur aser tesayur Kashmiri pandit, Deepak Chand na khaseta liasü.



Bangladesh nung Hindu nung tepsetba aser Durga süngyanglu raksatsüba anema October 18 nü Nadia nung Bajrang Dal züngsemtemi longkak aitba noksa nung angur.



Indian Foreign Minister Subrahmanyam Jaishankar-i Jerusalem nung aliba Yad Vashem Holocaust Memorial nung Hall of Remembrance nung naro yutsüba noksa ka yangi angur.

Kuwait totzü atsüdak mi adok, nisung kar yiru

Kuwait City, Mongputeni/ Oct. 18 (Agencies): Kuwait nung totzü atsüdak tesem tulutiba nung mi adokba azüoktetogo, aser yangji mokozü saokba densema yirur aika liasü, ta sorkar meyong iba totzü company ajanga ashi.

Saudi Arabia den arütsüa alidak Kuwait indang Persian Gulf tükumlen Mina al-Ahmadi oil refinery nung Hombarnü mi adokba yagi electrical supply mesüra totzü dangaleni bener aoba nung timtem magütsü, ta Kuwait National Petroleum Company (KNPC) ajanga ashi.

Mi ya atmospheric residue desulphurisation (ARDS) unit nung adok aser iba tesem ya shibang aser mi remseptet, ta state refiner ajanga ashi.

Iba lendong nung yirurtem ya yangji teyari agütsü mesüra anasa aliba mozüki kati anir ao aser parnok tajungba lir, ta KNPC ajanga ashi.

"Totzü atsüa yangluba aser danga leni bener aoba maparen nung mokongshi aser local marketing operations aser electricity aser water ministry nem supply agütsüba nunga timtem magütsü," ta KNPC ajanga Twitter nung ashi.

Kuwait tükumlen Fahaheel district nung alirtemi ola tulu adoka apokba osang prokshi aser highway kolaklen mokozü tanak aser temelem adoka aliba noksa social media nung lemsatepa liasü.

Kuwait nungya nütsüng yongsük million 4.1 lir, aser

yangi ali telung nung totzü aliba ya alima nung timtiba jenjang trok buba nung lir.

Mina al-Ahmadi refinery ya ali tasazük square kilometre 10.5 nung lir, koba 1949 küm nungi totzü atsü tenzük.

Sorkar meyong petrol company asem aliba nungi ibai tulutiba lir, kong anogo ka nung petrol barrels 466,000 shi yanglur.

Ano refinery pezübuba tang teyangludak lir, koba nung anogoshi totzü barrel 615,000 yanglutsü aser ibai küm tatemlen nungi mapa minyak tenzüksü.

Iba linük nungya anogoshi totzü barrels million 2.4 shi yanglur aser timba bendang lima nung bener oa ayoker.

EU-i ita 10 tsüngda Covid-19 vaccine doses billion 1 dak tema agütsüogo

Brussels, Mongputeni/ October 18 (Agencies): European Union (EU)-i taoba ita 10 tsüngda Covid-19 vaccines dose billion 1 dak tema export süogo, ta bloc indang tekolakba Ursula von der Leyen-i Hombarnü ashi.

"European Union ya Covid-19 vaccines export asür tongtiba lir ta tejangja," ta lai alizüng tasen tongtetba indang sangdongba mapang ashi.

Von der Leyen-isa, vaccine dose million 87, WHO-i aniba Covax scheme ajanga sensaker linüktem aser teyongsü nung aliba linüktem nem agütsüogo, ta ashi.

EU-i yangluba Covid-19 vaccine ya timba linüktemi mekazüka yur alibatem lir.

Von der Leyen-isa ashiba agi, "EU-i taruba ita tashidak agi kanga mejungi kongshir aliba linüktem nem dose million 500 tenla agütsütsü," ta ashi. Laisa linüktem dang jenjang ajungketshitsü ayongzükogo.

Covid vaccination rates dak sendakba nung takar aser sensaker linüktem tsüngda tebandang tulu adoker aliba mapang ka nung lai iba osang sangdongogo.

European Union, United States, United Arab Emirates, Qatar, Singapore aser Japan nung nütsünyongsük tesadang dak tema nem vaccine ajunga agüjatokogo.

Kasa mapang nung Africa nung aliba linüktem aser Afghanistan, Egypt, Myanmar aser Syria amala linüktem nung nütsünyongsük shilem 10 majung nem dang vaccine agütsür lir.

European Union nung nütsünyongsük shilem 65.5 nem vaccine ajunga agütsüogo, aser tang parnoki vaccine export asütsü atema maparen benoka minyak tenzükogo.

Maneni United States nunga nütsünyongsük shilem 57 nem vaccine ajunga agütsüogo. Tir Joe Biden-i taoba hopta, pai aniba sorkari Africa atema tenla bendentsüba dose million 67 jungogo, ta ashi.

WTO chief Ngozi Okonjo-Iweala-i, iba ita tetenzüklen alima ajunga nung vaccine dose billion trok tema agütsüba nungi shilem 1.4 dang sensaker linüktem nung agütsüba lir ta ashiba sülen G20 linüktemi Covid-19 vaccines kasasa alemtsü atema nangzüka liasü.

European Union-i vaccine export control mechanism ka benoka lir aser iba kübok bendangleni yoktsü aliba dose tem tamasa Brussels aser member state temi agizüksü nüngdaker.

Ajisüak tang tashi nung Australia dangi yoktsü aliba AstraZeneca vaccine dose 250,000 dang April ita nokdanga lir.

Myanmar opposition temi rongrong adokdaksür: Min Aung Hlaing

Naypyidaw, Mongputeni/ Oct. 18 (Agencies): ASEAN lenirtemi tain ita amentsü aliba senden nung mejaoksang, Myanmar army tekolakba Min Aung Hlaing-i ashiba agi, February 1 nü mitkar temi tashiyim amshia sorkar atsüngdokba ajanga linük nung mepetmesü adoker alidak mitkartemi yimjung bener arütsü merang dang parnok anemertemi rongrongshirong tali adokdaksür.

Association of Southeast Asian Nations (ASEAN) ajanga hopta tatemlen Myanmar nungi "non-political" representative ang ka jaoktsü ta sangdongba sülen mitkar lenir Min Aung Hlaing-i iba o ya Hombarnü state television nung ashi.

ASEAN nung züngsem ter lenirtem ya October 26-28 anogotem ajuruteptsü lir.

"Kiralongrar teloki ajungmesoba ajanga azüdokshi tali ajurur," ta Min Aung Hlaing-i mitkar yimsüsüba anemer athishia ashi.

"Parnoki azüdokshiba shingaia süoki ia magizüker aser onok dang ken o angatetteptsü akhanger. ASEAN ajanga iba atema inyaksüla."

Election agiba nung Aung



San Suu Kyi'er National League for Democracy (NLD) ajanga takok ngur parliament senteptsü lia mitkar temi Myanmar nung tanem tanemi democracy dangi meyipba maparen tembangdakja yimten tashi rakzük.

Mitkartemi sorkar atsüngdokba anema nüburtemi longkak ait aser nisung karbo linük arütsülen ethnic armed

group tem den training agütsü ao, shirnok mitkartem den küm aika rara arua liasü.

Sorkar atsüngdokba sülen security forces temi tanurtem densema nisung 1,178 shi tepsetogo, ta Assistance Association for Political Prisoners (AAPP) ajanga ashir.

Mitkar lenirtem anema nokdaksü September ita sangdongba National Unity

Government (NUG) ajanga ASEAN telemtetba pela agizüka liasü.

NUG ya linük tenüng nung shimer tejangja ama züngshitsüla aser shidakba nunga telok kata nunga madener yoktsüa molunga lir, ta parnoki ashi. NUG nungya NLD nungia teshimtet nübu kar densema lir, shirnok mitkartemi office nungi agiena liasü.

"ASEAN-i Min Aung Hlaing mezüngokba ya tongtipang mera ka lir, saka onok ya tim lenir ama agizüksü mepishir," ta odongtar Dr Sasa-i ashi.

April ita ASEAN den onük pungo inyaksü züngzüktepba nung mitkartemi azüdokshi tatem kati arudakja aser ASEAN special envoy ka linüki arua Aung San Suu Kyi densema party ajunga ajurutepdaksütsü shia liasü. Aung San Suu Kyi ya February 1 nü nungi pua yua lir.

Ajisüaka rara manener, talisa arütsülen northwestern Chin state nung nisung meyerijang aika pei ki nungi aridokogo. ASEAN envoy nem Aung San Suu Kyi majurudaksütsü, ta taoba hopta mitkartemi shia liasü.

Hokulbarnü senden balaka amenba sülen tain ita amentsü aliba mungdang nung Min Aung Hlaing jaoktsüsa tezüngzüktem nung terenlok peria mali, ta ASEAN-i ashi.

Hombarnü mitkartemi sangdong ka nung pua aliba nisung 5,600 dak tema chioktsü, ta sangdonga liasü. Mitkartemi sorkar atsüngdokba sülen nisung 9,000 dak tema pua lir.

NCB-i Laishiba aser Quran amshia Aryan aser tangartem sayutsüngi agütsü

New Delhi, Mongputeni/
October 18, 2021

(Agencies): Bollywood superstar Shah Rukh Khan'er jabaso Aryan Khan den tangartem Mumbai coast tsütsü Cordelia cruise ship nung party agia alidang NCB-i mita aoba sülen, parnok pua liasü. Tang, iba ken o dak sendakba nung pua alir ajak Arthur Road Jail nung yua lir aser video call ajanga parnok pei pei tsürabur aser adianutem den jembir.

Aryan aser tangartem apuba sülen, iba tentet (NCB) ajanga counselling achaayanga agi, kong, pua alir ajak pei pei tamangba yimsü dak apet Laishiba, Bhagavad Gita aser Quran amshia sayutsüngi agütsü.

Aryan nem counselling agütsüba mapang, Zonal Director Sameer Wankhede aser social worker tem dena liasü. Iba mapang, Aryan Khan-i NCB dang, pai joko kodanga tamajung/tim masüba inyakyim aser maparen nung madentsü aser lokti asoshi inyaksü ta ashi.

Anogo pungo tashi parnok custody nung aliba mapang, anogoshia ghonda 2 nungi 3 tashi Aryan, Arbaaz Merchant, Munmun Dhamecha aser tangartem sayutsüngi agütsü liasü. Iba dak alaka, parnok dang

temesepba mozü benshiba ajanga temang aser tekolok nung timtem balala adokdaksüba indang tekümdangtsü aser tesayuba agütsü.

Ibaji dang masü, saka NCB-i Mumbai nung aliba ISKCON temple priests aser cleric tem teyari agia pua alirtem dang temesepba mozü amshiba ajanga kibong nung rongnung aser timtem tulu adokdaksüba indang rasa ashi.

Parnok custody nung aliba mapang, NCB-i Muslim tamangba yimsü nung anidaksang Aryan Khan nem Quran züngdaksü aser kasaji pa den külemi pua alir tangartema Laishiba aser Bhagavad Gita züngdakja liasü

Sangdong ajanga angazükba agi, Aryan Khan nem sayutsüngiba agütsüba mapang, Zonal Director Sameer Wankhede aser social workers tem dena liasü aser parnok matsüngdang Aryan Khan-i, lokti asoshi inyaksü aser lokti nung sensakertem/tekübok jenjang nung alir taküm ajungkettsütsü asoshi inyaksü, ta ashi.

"Aryan-i senotsü agi anünga/ timtema alirtem ajak yaritsü ta shiogo," ta sangdong ajanga metetdaksü.

Aryan Khan, shiba "drugs-on-cruise" dak sendakba nung

pua liasü, Hokolbarnü (15.10.2021) Mumbai indang Arthur Road Jail telung nungi pai video call ajanga par tsürabur Shah Rukh Khan aser Gauri Khan den jembiogo, ta jail ketdangsurtemi ashi.


High Court tetuyuba nung shia aliba agi, tang Covid-19 mapang, pua alir mesüra tepuokdak alir temi hopta nung anaben tashi video call ajanga adianu aser kinunger tem den jembitetsü.

"Aryan-i par tsürabur den minute 10 tashi jembi liasü aser iba mapang jail ketdangsur ka dena liasü," ta ketdangsurtemi ashi.

Arthur Road jail nung tepuokdak nisung 3,200 shi lir. Tang Covid-19 tensa dak sendakba tetuyubatem nung, tepuokdak alirtem den adianu/kinunger tem ajurutsü asoshi memelar. Ajisüaka, parnoki phone ajanga jembitsü akok aser adianu mesüra kinunger den jembitsü asoshi minute 10 dang melar.

October 02, 2021 nü, Mumbai Coast tsütsü Cordelia cruise ship nung party agia lia NCB-i mita aoba sülen temesepba mozü ngutetba dak sendakba nung Nigeria nung ana densema nisung 20 shi pua lir. Iba maparen dak sendakba nung, NCB-i maneni bushisingdangdar.

Drummer *Ronnie Tutt* alima nungi pilaogo



Mongputeni/October 18, 2021 (Agencies): Nüngtugu kentener tejen, asür Elvis Presley indang drummer, Ronnie Tutt alima nungi pilaogo. Pa arishi küm 83 liasü.

Ronnie ya TCB Band indang züngsem ka liasü. Iba band ya King of Rock and Roll (Elvis) indang 'core rhythm section' ka lir aser August 1969 küm Ronnie-i iba band nung aden aser 1977 küm tashi pai iba band nung inyak. Kasa küm 'Hound Dog' ken atensang Elvis asü.

Musician, Ronnie-isa nüngtugu band talisa The Carpenters, Roy Orbison, Neil

Diamond, Billy Joel aser Jerry Garcia atema drummer ama shilem agiogo.

Elvis Presley Enterprises Instagram sabang nung, "Ronnie Tutt asüba osang angashia Elvis Presley Enterprises nung dena alir ajak temulung züreper.

"Drummer takotet ka den Graceland nung pa ya ajaki meimba nisung ka liasü. Elvis Week, Elvis' asoba anogomung aser tanga sentong aika nung pai onok den külemi shilem agiogo. Elvis maparen atema Ronnie ya ambassador tajung ka liasü," ta Elvis Presley Enterprises-i lemsateper.

"1969 nungi 1977 küm tashi TCB Band indang shilem ama Ronnie Tutt-i Elvis atema drummer ka ama shilem agiogo. Elvis' 1969 Las Vegas lapokba sentong nunga James Burton ajanga achaayangba maparen atema band nung pa denogo aser Elvis asüba küm (1977) tashi pai inyakogo," ta kasa sangdong nung shia lir.

Iba sülen, Ronnie-i Neil Diamond indang band tour nung aden. Ronnie-isa nüngtugu artist talisa Johnny Cash, Glen Campbell, Kenny Rogers, Elvis Costello, Stevie Nicks, Michael McDonald aser tanga artist tem den inyakogo.

Pelaba Lemsateper

Ozü temeim ojala ASÜR TEMSÜTULA (Yaongyimsen) ajungbena akümüli wadang tembanger onok mulung zürepa alidang shirkokisa sarasadem, nübu, rongsen agi onok dang meima yariogo, nenok ajak dang kinungertemi kanga pelaba lemsateper. Talisa agütsü aliba lokti aser kibongtem dang alakteta pelaba shisemer:

1. Yaongyimsen Baptist Arogo
2. Yaongyimsen Baptist Arogotsür
3. Shri. Imnatiba, Advisor, Industries & Commerce, Labour & Employment, Skills Development & Entrepreneurship, Govt. Of Nagaland.

Nenok temeim mapatem asoshi pelar aser tulusang Tsüngremi nenok ajak talubosa moajang ta onoki sarasadedsür.

~ Temeim kinungbo & kinungertem.



ASO: 1948
ASÜ: 16.10.2021



OFFICE OF THE UNGMA SENSO TELONGJEM

KOHIMA : NAGALAND

Regd. No. R/RS-1140 Dt. 17-10-2000

TENÜNGSANG AGÜTSÜR

Ungma Senso Telongjem Kohima Office ajanga Union züngsem nungi Wb. Asür Sakurenba Jamir jabaso **Er.TALIMEREN JAMIR JE.(E)** nungi Sub Divisional Officer (E), Dept. of Power, Government of Nagaland menden Promotion angutetba asoshi tenüngsang agütsür.

Tsüngremi pa tarutsü wadang nung ano maneni moajangma.

Sd/-
CHUBAMAYANG JAMIR
Tir , (USTK)

Sd/-
TEMJENSOWA JAMIR
Tongti Zulur, (USTK)

Pooja Bedi dak COVID-19 putet



New Delhi, Mongputeni/
October 18, 2021

(Agencies): Actor aser host Pooja Bedi dak COVID-19 positive putet aser lai ashiba agi, tekümdangtsü mera ajak agia anepaludar.

Deobar nikongdang Instagram video nung arishi küm 51 tain Pooja, shiba vaccine anema jembiba/vaccine magizükba nübu ka lir, tetong businessman, Maneck Contractor aser kidang teyariteper naprongla dak iba tashidak putet, ta metetdaksü.

"Kü dak COVID positive putetogo. Ajisüaka, ni vaccine magitsü aser kü sasa temang anepalua iba timtem nungi taneptsü angutsü asoshi inyaksü lemtetogo. Nenokia kechi tim ta bilemer, pei tangatetba nung inyakang. Aoksa malitsü saka tali kümdangshia lidi," ta Pooja-i lemsateper.

Actress Pooja, shibai 1992 küm nüngtugu film "Jo Jeeta Wohi Sikandar" nung tongti

shilem agi, lai ashiba agi, iba wara nungi yakta taneptsü angutsü kü dak teimla lir.

"Tang, iba timtem nungi taneptsü asoshi onok sasa anepaludar. Anogo ana asem tsüngda iba wara nungi taneptsü angutsü imlar. Kü dak iba timtem putetba ajanga anisüngzüka kazütsü mapang tajung angu amai bilemer. Tesüiba ita ishika nungi maparen balala nung mazüngi inyaka arur asünung, ashiko maparen tiptema inyaksü asoshi tangba mapang iba timtem ajanga Tsüngremi kü den jembir alitsü akok," ta lai ashi.

Hombarnü, Union Health Ministry sangdong ajanga angazükba agi, India nung nisung 13,596 dak coronavirus tashidak tasen putet. Tashidak tasen puteter densema, linük nung COVID-19 puteter nisung 3,40,81,315 tuogo. Tang, linük nung nisung 1,89,694 shi iba tashidak agi shirangdar.

NSF Trophy: Amsem, Phesama YO & Magdaline FC-i takok angu

Kohima, Mongputeni/October 18 (TYO): Hombarnü 21buba NSF Martyrs' Memorial Trophy nung Amsem Football Club, Phesama Youth Organisation aser Magdaline Coaching Football Club nungeri pei tata asaya kokogo. Iba asayamung ya Indira Gandhi Stadium Kohima nung tang tasayadak lir.

Hombarnü mezüngbuba asaya nung United Brothers FC-i goal 2-1 agi Amsem FC madak takok angu.

Asaya nung United Brother atema mezüngbuba goal Vilazo

Linyü-i idaktsü, ajisüaka Amsem atema Toshiakum-i goal ka idakja goal kasasa aküm. Iba sülen Thejangutuo-i United Brothers FC atema tanabuba goal idakja parnoki asaya akok.

Tanabuba asaya Phesama Youth Organisation aser Hooligans FC na asaya, koba Phesama-i goal 12-1 agi ayong ayonga akok

Asaya nung Moatemsü ajanga Hooligans puri mezüngbuba goal idaktsü, ajisüaka Chedevi Mejura-i iba goal ya küptok aser ano ka idaktsü. Kasa mapang nung

Phesama nungi asayatem rongnungi Vikehiezo Mejura-i hatrick idaktsü, Theja-i goal 4, Kedosekho Thanyü-i goal ana aser tatamsa Kevi Chuse-i goal ka idakja liasü.

Hombarnü asaya tatembangbuba Magdaline Coaching FC-i tie-breaker ajanga goal 6-5 agi Chandmari HSS Alumni koka liasü.

October 19 nü asayatem:

1. Puliebadze Club vs Dynamic FC @ 11:30 am
2. Chiiziema FC vs Berenike FC Meriema @ 1PM
3. Viswemi FC Vs Invictus FC Kezhakeno @2:30 PM.

Roger Federer top 10 nungi tuguogo



Paris, Mongputeni/October 18 (Agencies): Küm pongu tsüingda tang mezüngbuba Hombarnü sayaba ATP rankings nung Roger Federer top 10 nungi tuguogo. Kasa mapang nung Indian Wells champion Cameron Norrie jenjang 11 tejakdangi tuogo.

Arishi küm 40 tain Federer tetsüng tachichilen temekok yiruba ajanga July ita Wimbledon quarter-finals nung Hubert Hurkacz makokba sülen tang tashi khen danga asayaa mali. Poland nunger asayar Hurkacz, Indian Wells asayamung nung quarter tonga asayaba sülen jenjang ana tejakdangi tua 10buba tongtetogo aser Federer 11bubai asepzüka luogo.

2017 küm January ita nung tang tashi nung Grand Slam 20 koker aliba asayar ya tang mezüngbuba top 10 nungi tuguogo.

Norrie, shibai Deobarnü

Indian Wells asayamung nung Georgia nunger asayar Nikoloz Basilashvili koka liasü, pa jenjang 15buba tongtetogo.

Kasa mapang nung British nunger asayar Andy Murray ranking nung maneni tekübokba jenjangi lua jenjang 172buba nung lir.

ATP top 10:

1. Novak Djokovic (SRB) 11,430 pts
2. Daniil Medvedev (RUS) 9,630
3. Stefanos Tsitsipas (GRE) 7,995
4. Alexander Zverev (GER) 6,930
5. Rafael Nadal (ESP) 5,635 (+1)
6. Andrey Rublev (RUS) 5,560 (-1)
7. Matteo Berrettini (ITA) 4,858
8. Dominic Thiem (AUT) 3,815
9. Casper Ruud (NOR) 3,615 (+1)
10. Hubert Hurkacz (POL) 3,378 (+2).

ICC T20WC nung asayar 32 Abu Dhabi T10 atema shimogo

Mongputeni/October 18, 2021

(Agencies): Abu Dhabi T10 franchise tem atema draft ser aliba asayar 32 tang asayaa aliba tebur T20 World Cup nung pei linük nungi asayatsü.

Abu Dhabi T10 asayamung

ya UAE yimtiba nung November 19 nungi December 4 nü tashi asayatsü. Iba asayamung ya T20 World Cup tembangba sülen anogo pongu lir tenzüktü.

Nüngtugu asayar; Nicholas Pooran, Chris Gayle, Andre Russell, Fabian Allen, Dwayne Bravo, Evin Lewis, Obed Mccoy, Ravi Rampaul, Darren Bravo, Akeal Hosein aser Andre Fletcher nunger defending champions West Indies tenüng nungi T20 World



Cup nung asayatsü.

Kasa mapang nung Eoin Morgan, Moeen Ali, Chris Jordan, Reece Topley, Liam Livingstone, Tymal Mills, Adil Rashid aser Jason Roy nungera England team nungi asayaba angutsü.

Hazratullah Zazai, Qais Ahmed aser Rahmanullah Gurbaz nunger Afghanistan tenüng nungi asayatsü aser Dushmantha Chameera, Maheesh Theekshana, Chamika Karunaratne aser

W a n i n d u H a s a r a n g a nunger 2014 ICC World T20 champions Sri Lanka team nungi asayatsü.

Maneni Paul Stirling, Mark Adair, Curtis Campher aser Joshua Little nunger Ireland nungi asayatsü

a s e r Mohammed Saifuddin Bangladesh nunger aser David Wiese T20 World Cup nung Namibia team nungi asayaba angutsü.

Item asayatem ajaka ya Abu Dhabi T10 series nung team balala nungi asayatsü atema draft süa lir.

Abu Dhabi T10 series ya ICC-i temelaba agütsüba aser Emirates Cricket Board-i licence agütsür aliba alima nung mezüngbuba 10-over cricket asayamung lir.

Bhavani-i France nung fencing tetoktepba ka kokogo



New Delhi, Mongputeni/October 18 (Agencies): Fencer Bhavani Devi, shiba India tenüng nungi Tokyo Olympics nung mezüngbuba fencing asaya nung shilem agia otsü tasen ka yangluogo, lai France nung Charlellville National Competition,

individual women's sabre event nung takok nguogo.

Arishi küm 28 tain asayari iba osang ya Twitter ajanga lemsatapa liasü.

"France nung Charlellville National Competition nung Women's Sabre individual asaya kokogo. Coach

Christian Bauer, Arnaud Schneider aser teammate ajak dang kanga pelar. Season kanga junga tenzüktetba atema ajak nem tenüngsang agütsü," ta lai tweet asü.

Tokyo Olympics nung lai round-of-64 nung 15-3 agi Tunisia tsür Nadia Ben Azizi akok, ajisüaka round of 32 asaya nung France tsür bronze-medallist, Manon Brunet-i la tsükdaktsü.

Bhavani ya tang alima nung jenjang 50buba nung lir aser India nunger fencer tem rongnung temaba jenjang nung lir.

La 2022 Asian Games nung junga asayatsü atema tebilemba lir aser iba atema la renemshi tenzüko.

Curtis Campher-i ball pezü nung wicket pezü agi

Abu Dhabi, Mongputeni/October 18 (Agencies): Hombarnü Twenty20 World Cup nung Netherlands den asayaba mapang Ireland nunger fast bowler Curtis Campher-i, ball pezü nung wicket pezü agia liasü.

Campher-i Abu Dhabi nung asayaba mapang over ka nung Colin Ackermann (11) Ryan ten Doeschate (0) aser Scott Edwards (0) out süja hat-trick agi aser iba sülen Roelof van der Merwe (0) out süja liasü.

Afghanistan nunger asayar Rashid Khan aser Sri Lanka nunger Lasith Malinga na sülen T20 International puti otsü nung bowler tem rongnungi ball pezü nung wicket pezü agirtem rongnung pa tasembuba asayar kümogo.

Johannesburg nung asosang Campher ya T20 World Cup nung hat-trick agiba tanabuba asayar kümogo. Australia

nunger fast bowler Brett Lee-i dang T20 World Cup nung hat-trick ngur liasü. Pai 2007 küm World Cup nung Bangladesh den asayaba mapang hat-trick agia liasü.

Arishi küm 22 tain Campher taküm küm tetenzülen Zimbabwe den Dublin nung asayaa international career tenzüker aser pai taoba asaya pezü nung tajungtiba asayabaji run 19 agütsür wicket 3 agir lir.

Hombarnü asaya nung pai ends melener ball aon koba pa atema kanga tajangzüker liasü. Ackermann atema Ireland-i review agi aser ultra edge technology ajanga Ackermann indang gloves nung ball agi aonba sayua liasü.

Hat-trick ball nung on-field official-i Edwards dak tetsüng nung aonba out magütsü saka tanaben asadangshiba sülen iba ball yagi leg stump nung onshitsü aliba nguteta out agütsü.

BILEMDANGANG

"Karaa angazüktsü merangang saka mit adoktsü milungi süang."